



Terenga 3: Hōtaka 37 - He kupu poroporoaki

He Mihi

E ngā mahuetanga iho o te hunga nā rātou i para te huarahi hei hīkoinga mā tātou, nau mai, haere mai ki te ikapahitanga o Ngākau nui ki te reo.

Hei Mahi Whakarongo

Kia hoki anō tātou ki te whakarongo ki tētehi tīpakonga o te hōtaka o Whakataukī me ngā whakaaro o Pio Jacobs ki tētehi kōrero poroporoaki mate a ōna kaumātua. Anei ngā pātai hei whakautu mā koutou:

- 1) Nō whea a Pio?
- 2) Ko hea ngā whanga e rua i whakahuatia ai e ia?
- 3) He aha te poroporoaki a ngā kaumātua?

He Whakamārama

I roto i ngā poroporoaki ki te hunga mate, ka rangona ngā kupu me ngā kīanga ātaahua rawa atu hei tuku i te wairua o te tangata ki te wāhi tika. Tirohia ngā kupu e whai ake nei.

He tohutohu:

haere, hoki wairua mai, takoto mai, tīraha mai, whāia, takahia, whakangaro atu rā...

He wāhi e haere ai te wairua:

- tikitiki o Rangī
- Mirumiru te pō
- huinga o te kahurangi
- kāpunipuni o te wairua
- te pūtahitanga o Rehua
- te pō tūtanganui o Pipiri
- te urunga, tē taka, te moenga tē whakaarahia
- ki a Nunui mā, ki a Roroa mā

He kupu whakarite:

- te ringa whero (*rangatira*)
- te kaingākau (*treasured*)
- te ringa tango parahia (*hard worker*)
- te ringa tōhau nui (*industrious*)
- te ringa rehe (*expert craftsperson*)
- te uri o Hine-pū-te hue/Raukatauri (*musician*)
- taku manu mātārae (*leader, mentor*)

Hei Mahi

Tuhia he kupu poroporoaki ki tētehi tangata kua mate kē.

1. E...(kupu whakarite) *E taku tōtara haemata*
2. (tohutohu) *Moe mai rā*
3. (wāhi e haere ai te wairua) *ki te pae o maumahara*
4. (kupu whakakapi) *Hei taumarumarū i taku aroha mutunga kore.*

He Kupu Poroporoaki:

(Māu e tuhi āu kupu i konei)